



**Sumáriu Kazu**  
**Tribunál Judisiál Primeira Instáncia Suai**  
**Fevereiru 2023**

**Afirmasaun:** Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida. **JSMP** kondena maka'as forma violénsia hotu-hotu, liuliu hasoru feto no ema vulneravel. JSMP afirma la iha justifikasaun ba kualkér violénsia hasoru feto.

**A. Sumáriu prosesu julgamentu kazu iha Tribunál Judisiál Primeira Instáncia Suai**  
**1. Totál kazu ne'ebé JSMP monitoriza :18**

Artigu	Tipu Kazu	Númeru
Artigu 145 Kódigu Penál (KP), no artigu 2,3, 35 Lei Kontra Violénsia Doméstika (LKVD)	Ofensa ba integridade fizika simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika no 36 kona-ba krime sira violénsia doméstika nian hanesan krime publiku)	9
Artigu 295 KP	Pekulatu	1
Artigu 316 KP	Kontrabandu	1
Artigu 145 KP, Artigu 258 KP no Artigu 20 (1), artigu 2 (2 alinea f) Lei Arma Brankas	Ofensa ba integridade fízika simples danu simples no arma brankas	1
Artigu 145 KP	Ofensa ba integridade fízika simples	1
Artigu 243 KP no Artigu 253 KP	Obstrusaun ba autoridade públiku no roubu	1
Artigu 157 KP no Artigu 20 (1), artigu 2 (2 alinea f) Lei Arma Brankas	Ameasa no arma brankas	1
Artigu 267 KP	Burla agravadu	1
Artigu 145 KP no Artigu 20 (1), artigu 2 (2 alinea f) Lei Arma Brankas	Ofensa ba integridade fízika simples no arma brankas	1

Rua Beco Lakateu, Aldeia Manu fuik,  
Suku Colmera, Administrativu Vera Cruz  
Dili Timor Leste  
PoBox: 275

Telefone: 3323883 | 77295795

[www.jsmp.tl](http://www.jsmp.tl)

[info@jsmp.minihub.org](mailto:info@jsmp.minihub.org)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl

Artigu 145 KP no Artigu 260	Ofensa ba integridade física simples no danu ho violénsia	1
<b>Total</b>		<b>18</b>

## 2. Totál desizaun ne'ebé JSMP monitoriza:13

Tipu pena	Artigu	Númeru
Suspensaun ba prizaun nia ezeusaun	Artigu 68 KP	9
Suspensaun ba prizaun nia ezeusaun selu kustu judisiál	Artigu 68 KP	1
Absolve		1
Suspensaun ba prizaun nia ezeusaun no Absolve	Artigu 68 KP	2
<b>Total</b>		<b>13</b>

## 3. Total kazu sira ne'ebé adia tuir JSMP nia monitorizasaun:0

## 4. Totál kazu sira ne'ebé sei kontinua prosesu tuir JSMP nia monitorizasaun: 5

### B. Deskrisaun sumáriu julgamentu ba desizaun kazu sira

#### 1. Krime kontra bandu

Nú. Prosesu : 0093/19.BBMLV  
 KompozisaunTribunál : Koletivu  
 Juis : Dr. Jose Maria de Araújo, Dr. Naason M. A. Marques Doutel no Dra. Patricia de Araújo F. M. G. B. Xavier  
 Prokuradór : Dr. Rafael Jeonimo Gusmão  
 Defeza : Dr. Domingos dos Santos  
 Desizaun : Pena prizaun tinan 2 suspende ba tinan 3

Iha 9 Feveiru 2023, Tribunál Judisiál Primeira Instánsia Suai prezide julgamentu leitura akordaun ba krime kontra bandu ne'ebé envolve arguidu Eusebio dos Santos no Martinho Mau Belo hasoru Estadu RDTL, iha Munisípiu Bobonaro.

#### Akuzasaun Prokuradór

Prokuradór akuza katak iha 21 Juñu 2019, arguidu Eusebio dos Santos kontaktu ba arguidu Martinho Mau Belo hodi informa katak sigaru iha ona, tuir mai iha oras tuku 02:00 madrugada arguidu Martinho Mau Belo kondus nia kareta baskolante hodi dirije ba iha arguidu nia uma hodi sosa sigaru *Joker* Karton haat (4) ho totál osan hamutuk US\$300.00, hafoin sosa tiha arguidu tula ba merkadu Maliana ho objetivu atu faan ba nia kliente maibé la konsege, tanba iha dalan Polísia sira deskobre, no halo kedas aprensaun.

Prokuradór akuza arguidu sira kontra artigu 316 KP kona-ba krime kontra bandu nú 2 ho moldura penál tinan 2 too 8 prizaun ka multa.

### **Produsaun ba prova sira**

Iha julgamentu arguidu sira konfesa faktu hotu iha akuzasaun, arguidu sira deklara katak la iha karta lisensa kona-ba exportasaun no inportasaun, arguidu foin mak mai hatan iha tribunál no depoisde akontesimentu too agora lahatama ona sasan liu husi dalan illegal.

### **Alegasaun Finál**

Prokuradór, konsidera arguidu sira komete krime kontra bandu ne'ebé arguidu sira konfesa, prokuradór haree katak krime kontra bandu aas tebes iha área sira fronteira, nune'e atu prevene krime ne'e husu ba tribunál atu kondena arguidu sira tuir artigu 316 KP.

Entretantu, defeza haktuir katak iha julgamentu arguidu sira konfesa faktu hotu iha akuzasaun no depoisde akontesimentu arguidu sira lahatama ona sasan tuir dalan illegal no foin mak mai hatan iha tribunál, nune'e husu ba tribunál atu kondena arguidu sira ho pena multa.

### **Desizaun**

Depoisde avalia faktu sira hotu, tribunál prova katak arguidu sira provadu komete krime kontra bandu. Bazeia ba faktu provadu sira ne'e no tetu mós ho sirkunstánsia atenuante sira hanesan arguidu sira konfesa, arrepende ona sira nia hahalok, nune'e tribunál konklui prosesu ne'e no kondena arguidu sira ho pena prizaun tinan rua suspende ba tinan tolu no kondena arguidu Martinho Mau Belo selu kustu judisiál US\$25.00, entretantu ba arguidu Eusebio dos Santos la selu kustu judisiál, tanba la iha rendimentu.

## **2. Krime ofensa ba integridade fízika simples ho natureza violénsia doméstika**

Nú. Prosesu	: 0142/21.PDSUA
Kompozisaun Tribunál	: Singulár
Juis	: Dr. Naason Mário Armindo Marques Doutel
Prokuradór	: Dr. Nelson J. S Magno
Defeza	: Dr. Domingos dos Santos
Desizaun	: Pena Prizaun fulan 6 suspende ba tinan 1

Iha 10 Fevereiro 2023, Tribunál Judisiál Primeira Instánsia Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AM hasoru nia eis feen, iha Munisípiu Covalima.

### **Akuzasaun prokuradór**

Prokuradór akuza katak iha 21 Dezembru 2021, iha oras tuku 8:00 dadeer, arguidu basa dala haat iha lezada nia hasan parte loos, dala tolu iha hasan parte karuk, buti lezada nia kakorok no riba lezada ba rai hafoin sama lezada nia hirus matan rezulta moras maka'as no bubu. Antes agresaun ne'e, lezada husu arguidu dehan "ó dader ne'e atu halo saida", arguidu lahatan no komete kedan agreasaun refere hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál tinan 3 ka multa konjuga ho artigu 2, (a) 3 (c), 35 (b) no 36 LKVD.

### **Produsaun ba prova sira**

Iha prosesu julgamentu, arguidu konfesa faktu hotu iha akuzasaun, arguidu deklara katak depoisde akontesimentu moris separa ona ho lezada, arguidu arrepende ona nia hahalok katak baku feen ladi'ak, promete iha futuru hola feto fali karik sei labaku feen no ema seluk.

Alende ne'e, lezada kontinua konfirma faktu hotu iha akzasaun no deklara katak depoisde akontesimentu separa ona ho arguidu, lezada deklara katak sira iha oan ida no too agora arguidu la tau matan mezmu sira konkorda ona atu arguidu kada fulan tranfer osan liuhusi lezada nia konta bankaria. Lezada deklara liután katak arguidu nia aktu ne'e lezada hemu de'it aimoruk tradisional, la ba ospital tanba momentu ne'e covid.

### **Alegasaun finál**

Prokuradór haktuir katak, iha julgamentu arguidu konfesa faktu hotu iha akuzasaun no konfirma husi lezada, prokuradór haree katak kazu violénsia doméstika aas tebes nune'e atu halo prevensaun ba krime refere, husu ba tribunál kondena arguidu ho pena prizaun maibé suspende nia ezelesaun.

Enkuantu, defeza haktuir katak arguidu konfesa, arrepende nia hahalok no agora sira separa tiha, defeza entende katak la iha ona kontinuasaun krime tanba sira separa ona, tanba ne'e husu ba tribunál atu kondena arguidu ho pena multa.

### **Desizaun**

Depoisde avalia faktu sira hotu, tribunál prova katak arguidu basa dala haat iha lezada nia hasan parte loos, basa dala tolu iha lezada nia hasan parte karuk, buti lezada nia kakorok no riba lezada ba rai hafoin sama lezada nia hirus matan rezulta moras maka'as no bubu. Bazeia ba faktu provadu sira ne'e no tetu mós sirkunstánsia hotu-hotu ne'ebé haleu krime nune'e tribunál konklui prosesu no kondena arguidu ho pena prizaun fulan neen suspende ba tinan ida.

### **3. Krime ofensa ba integridade fízika simples ho natureza violénsia doméstika**

Nú. Prosesu	: 0081/21.BBMLV
Kompozisaun Tribunál	: Singulár
Juis	: Dr. Naason Mário Armindo Marques Doutel
Prokuradór	: Dr. Rafael Jeronimo Gusmão
Defeza	: Dr. Domingos dos Santos
Desizaun	: Absolve

Iha 13 Fevereiru 2023, Tribunál Judisiál primeira Instánsia Suai prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu AMGF hasoru nia feen SdS, iha Munisípiu Bobonaro.

### **Akuzasaun prokuradór**

Prokuradór akuza katak iha 9 Setembru 2021, iha oras tuku 15:00 lokraik, arguidu fila husi serbisu fatin ho kondisaun lanu no ba iha lezada nia inan nia uma hodi tula fila lezada ba sira nia uma, bainhira too iha dalan arguidu hirus lezada dehan “ohin hau telefone ó ka lae”, maibé lezada hatan dehan hau telefone la iha, “ó mak iha telefone,” nune’e arguidu basa dala ida iha lezada nia hasan maibé kois de’it. Tuir mai arguidu la kontrola motor tanba ho kondisaun lanu todan, nune’e arguidu ho lezada monu no halo lezada hetan kanek iha ain tuur parte karuk, depois sira rua sae fali sira nia motor no too iha uma arguidu kontinua tebe dala ida iha lezada nia hirus matan no haruka lezada fui bé atu fó arguidu maibé arguidu foti tiha bee no fakar ba lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, (a) 3 (c), 35 (b) no 36 LKVD.

### **Produsaun ba prova sira**

Iha prosesu julgamentu, arguidu nega faktu sira iha akuzasaun, arguidu deklara katak fila husi serbisu fatin ho kondisaun lanu no ba tula lezada atu fila ba sira nia uma maibé too iha dalan ho kondisaun arguidu lanu nune’e motor baku fila arguidu nia ain-tuur rua kanek hotu lezada mós nia ain-tuur kanek, arguidu deklara katak la basa lezada no la tebe lezada tanba momentu ne’e ain kanek todan.

Enkuantu lezada deklara katak momentu ne’eba arguidu fila husi serbisu ho kondisaun lanu no tula lezada atu fila ba sira nia uma, maibé too iha dalan klaran arguidu la kontrola nune’e motor baku fila, lezada deklara katak arguidu la basa, la tebe no la fakar bee, lezada haktuir katak ema seluk mak ba keixa arguidu.

Bainhira lezada mantein nia deklarasaun iha julgamentu ne’e tribunál fó advertensia, maibé lezada deklara katak loos mak foin koalia ne’e. Tribunál imediata hasai sertidaun ba lezada tanba fó deklarasaun falsu, nune’e husu ba prokuradór atu prosesu lezada ba falsa deklarasaun.

### **Alegasaun finál**

Prokuradór, haktuir katak mezmú iha julgamentu arguidu nega no lezada deklara katak arguidu la halo aktu hasoru lezada, prokuradór haree katak bainhira parte sira di’ak malu ona sira fó sira nia deklarasaun la tuir ona saida mak iha akuzasaun, maibé prokuradór husu ba tribunál atu konsidera nafatin faktu iha akuzasaun no husu ba tribunál kondena arguidu tuir artigu 145 KP.

Entretantu, defeza haktuir katak perante julgamentu arguidu deklara katak la halo aktu hasoru lezada no lezada mós deklara katak arguidu la halo asaun krime hasoru lezada, tanba ne’e husu ba tribunál atu absolve arguidu.

### **Desizaun**

Depoisde avalia faktu sira hotu, tribunál julga akuzasaun husi prokuradór konsidera la provadu hotu, tanba durante produsaun prova arguidu nega hotu no lezada mós deklara

katak arguidu nunka baku lezada iha momentu ne'eba. Tribunál konsidera la iha prova ida katak arguidu halo aktu hasoru lezada, nune'e tribunál konklui prosesu ne'e no absolve arguidu husi prosesu ne'e.

#### **4. krime ofensa ba integridade física simples ho natureza violéncia doméstika**

Nú. Prosesu : 0007/21.MFALS  
KompozisaunTribunál : Singulár  
Juis : Dr. Jose Maria de Araújo  
Prokuradór : Dr. Nelson J. S. Magno  
Defeza : Dr. Anselmo Pinto  
Desizaun : Pena prizaun fulan 6 suspende ba tinan 1

Iha 17 Feveireiru 2023, Tribunál Judisiál Primeira Instáncia Suai prezide julgamentu leitura sentensa ba krime ofensa ba integridade física simples ho natureza violéncia domestika ne'ebé envolve arguidu FdC hasoru nia feen, iha Munisípiu Manufahi.

#### **Akuzasaun Prokuradór**

Prokuradór akuza katak iha 25 Agustu 2021, iha oras tuku 10:30 kalan, arguidu foti fiu kesi karau baku dala ida iha lezada nia kidan parte karuk no foti ai naton baku dala iha kotuk laran. antes ne'e arguidu haruka lezada ho arguidu atu ba lia moris ida iha arguidu nian, maibé lezada lakohi nune'e arguidu komete aktu refere hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, (a) 3 (c), 35 (b) no 36 LKVD.

#### **Produsaun ba prova sira**

Iha julgamentu arguidu konfesa faktu sira iha akuzasaun, arguidu deklara katak arrepende ona nia hahalok, promete iha futuru sei la repete ninia hahalok ne'e hasoru lezada inkuli ema seluk, no foin mak primeiravés mai hatan iha tribunál.

Presinde lezada nia deklarasaun, tanba arguidu konfesa faktu hotu iha akuzasaun.

#### **Alegasaun Finál**

Prokuradór, haktuir katak arguidu konfesa faktu hotu no arrepende, maibé prokuradór haree katak krime violéncia doméstika aas tebes no atu prevene krime refere husu ba tribunál atu kondena arguidu ho pena prizaun no suspende nia ezekuasaun.

Entretantu, defeza haktuir katak arguidu konfesa faktu hotu iha akuzasaun no arrepende ona ninia hahalok, nune'e husu ba tribunál atu aplika pena ne'ebé justu.

#### **Desizaun**

Depoisde avalia faktu hotu, tribunál prova katak arguidu foti fiu kesi karau baku dala ida iha lezada nia kidan parte karuk no foti ai-naton baku dala ida iha lezada nia kotuk laran.

Bazeia ba faktu provadu hirak ne'e no tetu mós ho sirkunstáncia atenuante sira hanesan

arguidu konfesa, arrepende ona nia hahalok, foin primeiravés mai hatan iha tribunál no promete sei la komete tan krime hanesan iha futuro, ho nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

### **5. Krime ofensa ba integridade fízika fimples no krime arma branka**

Nú. Prosesu : 0008/22. CVMCT  
KompozisaunTribunál : Koletivu  
Juis : Dr. Naason M. A. Marques Doutel, Dr. Jose Maria de Araújo no Dra. Patricia de Araújo F. G. B. M. Xavier  
Prokuradór : Dr. Pascaçio de Rosa Alves  
Defeza : Dr. Domingos dos Santos  
Desizaun : Pena prizaun tinan 3 suspende ba tinan 3

Iha 20 Feveiru 2023, Tribunál Judisiál Primeira Instánsia Suai prezide julgamentu leitura sentensa ba krime ofensa ba integridade fízika simples no arma brankas ne'ebé envolve arguidu Armando Gusmão hasoru lezadu Rosito Gusmão, iha Munisípiu Covalima.

### **Akuzasaun prokuradór**

Prokuradór akuza katak iha 09 Maiu 2022, iha oras tuku 17:00 lokraik, arguidu ho lezadu diskute malu kona-ba motor, arguidu nerbozu foti katana hodi taa dala ida iha lezadu nia kotuk laran rezulta kanek suku pontu rua.

Prokuradór akuza arguidu kontra artigo 145 KP kona-ba ofensa ba integridade fízika simples ho moldura penál tinan 3 ka multa no artigo 20 (1), artigo 2 (2 alinea f) Lei Arma Brankas.

### **Produsaun ba ba prova sira**

Bazeia ba artigo 262 Nú.1 Kódigu Prosesu Penál (KPP) kona-ba tentativa ba konsiliaun, nune'e antes tama ba produsaun ba prova, juis halo tentativa konsiliaun ba arguidu no lezadu ba krime ofensa ba integridade fízika simples.

Iha tentativa konsiliaun ne'e lezadu hakarak deziste ninia keixa hasoru arguidu tanba antes ne'e arguidu ho lezadu dame malu tiha ona, arguidu mós simu lezadu nia dezisténsia ne'e no husu deskulpa ba lezadu no promete sei larepete ninia hahalok, prokuradór no defeza la iha opsaun, nune'e tribunál omologa tiha prosesu ne'e no kontinua julgamentu ba krime arma brankas.

Iha julgamentu arguidu konfesa faktu hotu iha akuzasaun no deklarata katak arrepende ona nia hahalok, foin primeiravés mai hatan iha tribunál no promete sei la komete krime hanesan iha futuro hasoru lezadu no ema seluk.

Presinde testemuña tanba arguidu konfesa faktu hotu iha akuzasaun

### **Alegasaun finál**

Prokuradór haktuir katak durante produsaun prova arguidu konfesa, maibé prokuradór

haree katak krime arma brankas ne'e aas tebes, nune'e atu halo prevensaun ba krime refere husu ba tribunál atu kondena arguidu tuir sirkuntansia ne'ebé iha.

Entretantu defeza haktuir katak arguidu konfesa no foin mak hatan iha tribunál no depoisde akontesimentu too agora arguidu la halo krime foun, nune'e husu ba tribunál atu kondena arguidu ho pena ne'ebé kmaan.

### **Desizaun**

Depoisde avalia faktu hotu, tribunál prova katak arguidu nerbozu foti katana hodi taa dala ida iha lezadu nia kotuk laran rezulta kanek suku pontu rua.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende ona nia hahalok, foin primeiravés ma hatan iha tribunál no promete sei la komete tan krime hanesan iha futuro, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

### **6. Krime ameasa no arma brankas**

Nú. Prosesu : 0019/22. CVSUI  
Kompozisaun Tribunál : Koletivu  
Juis : Dr. Naason M. A. Marques Doutel, Dr. Jose Maria de Araújo no Dra. Patriciçia de Araújo F. G. B. M. Xavier  
Prokuradór : Dr. Pascaçio de Rosa Alves  
Defeza : Dr. Domingos dos Santos (Defensoria Publika)  
Desizaun : Pena prizaun tinan 3 suspende ba tinan 3 fulan 6

Iha 20 Fevereiro 2023, Tribunál Judisiál Primeira Instánsia Suai prezide julgamentu leitura akordaun ba krime ameasa no arma brankas ne'ebé envolve arguidu Afonso Amaral Tai hasoru lezada Beatiz Soares Sanches, iha Munisípiu Covalima.

### **Akuzasaun prokuradór**

Prokuradór akuza katak iha 14 Fevereiro 2022, iha oras tuku 19:30 kalan, arguidu utiliza katana ida ho medida naruk 40 cm, belar 5 cm hodi dada lezada nia ulun no sé katana ba lezada nia kakorok atu taa mak sasin Carolina Sequera ba kaer tiha arguidu nia liman hodi hadau katana ne'e no ameasa lezada "*neneik hau sei oho ó*. Antes agresaun ne'e, lezada sempre kolia hela de'it kona-ba uma ne'ebé mak arguidu hela, tanba uma ne'ebé mak arguidu sira hela ne'e pertense ba arguidu nia aman nian, agora nia matebian ona no lezada hanesan feen daruak husi arguidu nia aman no dadaun lezada kaben ona ho mane seluk.

Prokuradór akuza arguidu kontra artigu 157 KP kona-ba krime ameasa ho moldura penál tinan 2 ka multa konjuga ho artigu 20 (1), artigu 2 (2 alinea f) Lei Arma Brankas.

### **Produsaun ba prova sira**

Bazeia ba artigu 262 Nú.1 KPP kona-ba tentativa ba konsiliaun, nune'e antes tama ba julgamentu produsaun ba prova, juis halo tentativa konsiliaun ba arguidu no lezada kona-ba krime ameasa maibé lezada la aseita nune'e kontinua ba julgamentu.

Iha julgamentu arguidu konfesa faktu hotu iha akuzasaun, arguidu deklara katak ameasa lezada tanba lezada kolia barak loos, arguidu arrepende ona nia hahalok no promete sei larepete ninia hahalok, arguidu foin mak mai hatan iha tribunál.

Alende ne'e lezada kontinua konfirma faktu iha akuzasaun no deklara katak durante ne'e kada semana ba hamos uma refere, lezada deklara tan katak bainhira hasoru arguidu iha dalan sente tauk.

### **Alegasaun final**

Prokurador konsidera arguidu provadu komete krime hasoru lezada bazeia ba konfisaun arguidu nian no konfirma mos husi lezada, nune'e atu prevene krime hanesan akontese tan iha futuru, husu ba tribunál atu kondena arguidu tuir konviksaun tribunál nian.

Entrantru defeza haktuir katak mezmua iha julgamentu arguidu konfesa, maibe defeza nia entende katak ba krime ameasa ne'e la priense tanba depoisde problema lezada nafatin ba hamos uma ne'ebé sira hadau malu no ba krime arma brankas katana ne'ebé arguidu kaer ne'e lezada nia laen nian tanba ne'e defeza haree katak arguidu nia aktu ne'e la priense krime arma brankas, tanba ne'e husu ba tribunál atu absolve arguidu husi krime rua ne'e.

### **Desizaun**

Depoisde avalia faktu sira hotu, tribunál prova katak arguidu se katana ba lezada nia kakorok no amiasa atu oho lezada. Tribunál entende katak krime amiasa la priense tanba depoisde akontese lezada nafatin ba hamos uma, no hasoru malu bebeik arguidu iha dalan, ba krime arma brankas tribunál konsidera provadu tanba arguidu kaer katana.

Bazeia ba faktu provadu no la provadu sira no tetu mos ho sirkunstansia atenuante sira hanesan arguidu konfesa, arrepende ona nia hahalok no promete sei la komete tan krime hanesan iha futuru, nune'e tribunál konklui prosesu ne'e absolve arguidu husi krime ameasa no kondena arguidu ba krime arma brankas ho pena prizaun tinan tolu suspende ba tinan tolu.

### **7. krime ofensa ba integridade física simples ho natureza violência doméstica**

Nú. Prosesu : 0043/21.BBMLV  
KompozisaunTribunál : Singulár  
Juis : Dr. Naason Mário Armindo Marques Doutel  
Prokurador : Dr. Nelson J. S. Magno  
Defeza : Dr. Anselmo Pinto  
Desizaun : Pena prizaun fulan 3 suspende ba tinan 1

Iha 20 Fevereiro 2023, Tribunál Judisiál Primeira Instáncia Suai prezide julgamentu leitura sentensa ba krime ofensa ba integridade física simple ho natureza violência doméstica ne'ebé envolve arguidu AdFN hasoru nia feen, iha Munisípiu Bobonaro.

### **AkuzasaunProkurador**

Prokuradór akuza katak iha 03 Juñu 2021, oras 07:00 dadeer, arguidu husu ba lezada katak *“horikan ó ba ne’ebé”* no lezada hatan katak *“hau ba ama ki’ik sira iha kanu ibun”* no arguidu hatan katak *“ó ba buka mane ka”* lezada ho hirus foti telefone tuda ba arguidu no arguidu koalia nafatin liafuan ne’ebé hanesan, lezada foti ai-sar hodi baku arguidu, nune’e arguidu buti lezada nia kakorok rabat ba parede no lezada tuur tun ba rai kaer tudik modo nian hodi ameasa arguidu hafoin arguidu husik lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál too tinan 3 ka multa konjuga ho artigu 2, (a) 3 (c), 35 (b) no 36 LKVD.

### **Produsaun ba prova sira**

Iha julgamentu, arguidu hili direitu nonook. Entretantu lezada kontinua konfirma faktu hotu iha akuzasaun, lezada haktuir tan katak depoisde akontesimentu di’ak malu fali no too agora arguidu la repete ninia hahalok hasoru lezada.

### **Alegasaun finál**

Prokuradór haktuir katak iha julgamentu arguidu hili direitu nonook, maibé lezada kontinua konfirma faktu hotu iha akuzasaun, prokuradór haree katak número violénsia doméstika aas tebes nune’e atu hamenus krime refere, husu ba tribunál atu kondena arguidu ho pena prizaun no nia ezekusaun suspensaun.

Entretantu defeza haktuir katak husu ba tribunál atu kondena arguidu ho pena ne’ebé adekuadu.

### **Desizaun**

Depoisde avalia faktu sira hotu, tribunál prova katak arguidu husu ba lezada katak *“horikan ó ba ne’ebé”* no lezada hatan katak *“hau ba ama ki’ik sira iha kanu ibun”* no arguidu hatan katak *“ó ba buka mane ka”* lezada ho hirus foti telefone tuda ba arguidu no arguidu koalia nafatin liafuan ne’ebé hanesan, lezada foti ai-sar hodi baku arguidu, nune’e arguidu buti lezada nia kakorok rabat ba parede no lezada tuur tun ba rai kaer tudik modo nian hodi ameasa arguidu hafoin arguidu husik lezada.

Bazeia ba faktu provadu hirak ne’e no tetu mós ho sirkunstânsia hotu-hotu nune’e tribunál konklui prosesu no kondena arguidu ho pena prizaun fulan tolu suspende ba tinan ida.

### **8. Krime obstrusaun ba autoridade pública no krime roubu**

Nú. Prosesu	: 0019/17. CVSLL
Kompozisaun Tribunál	: Koletivu
Juis	: Dr. Jose Maria de Araújo, Dr. Naason M. A Marques Doutel no Dr. Patricia de Araújo F. G. B. M. Xavier
Prokuradór	: Dr. Pascaçio da Rosa Alves
Defeza	: Dr. Jonas Henrique da Costa
Desizaun	: Pena prizaun tinan 3 suspende ba tinan 3

Iha 20 Feveireiru 2023, Tribunál Judisiál Primeira Instânsia Suai prezide julgamentu leitura akordaun ba krime obstrusaun ba autoridade pública no krime roubu ne’ebé

envolve arguidu Evaristo de Araújo hasoru Estadu RDTL, iha munisípiu Covalima.

### **Akuzasaun prokuradór**

Prokuradór akuza katak iha 14 Agostu 2017, iha oras tuku 08:30 dadeer, arguidu Evaristo de Araújo tama iha instalasaun públika-Eskola Ensino Basico Filial Fohobua, lokaliza iha Aldeia Baer, Suku Biseuk, Postu Administrativu Tilomar, Munisípiu Covalima. Iha altura ne'e profesora Cezaltina de Araújo prepara atu tama hanorin estudante ho nune'e nia entrega xave sala eskola nian hamutuk tolu (3) ba alunu Estefanus de Lima atu loke odomatan, maibé derepente arguidu mai husi kotuk hodi hadau tiha xave sira ne'e ho maneira obriga no rasta de'it husi alunu nia liman no ameasa dehan "*hahu ba oin eskola para*" katak labele hala'o prosesu apredijazem iha fatin refere tanba rai ne'e arguidu nian. Ho situasaun refere provoca profesor/a sira no estudante sira hotu tauk no trauma no la hala'o aktividade apredijazem durante semana rua nia laran. Hafoin liu tiha semana rua, eskola refere loke fila fali ba publiku no uza xave rezerva hodi loke sala eskola nian.

Prokuradór akuza arguidu kontra artigu 243 KP kona-ba krime obstrusaun ba autoridade públika ho moldura penál tinan 2 too 6 no artigu 253 KP kona-ba krime roubo ho moldura penál tinan 3 too 10.

### **Produsaun ba prova sira**

Iha arguidu deklara katak momentu ne'e ba eskola refere hadau tiha xavi odamatan husi estudante no hatete agora ba oin resolve tiha problema mak imi eskola fali se bainhira seidauk resolve eskolapa para, arguidu deklara katak rai ne'ebé estadu uza ba loke eskola ne'e pretense ba arguidu nian, arguidu deklara katak depoisde hadau tiha xavi laba ona eskola refere.

Tuir testamuña Arminda Martins deklara katak nia hahu hanorin iha Eskola Ensino Basico Filial Fohobua desde 2009 pozisaun hanesan koodenadora, rai refere comunidade, autoridade lokal, parte seguransa no veteranus sira mak decide hodi fó ba estadu hodi konstrui eskola. testemuña mós deklara katak durante konstrui eskola iha tinan 2008 arguidu nunca reklama katak rai ne'e ninia. Too mai tinan 2016 mak arguidu ba taka avizu iha eskola refere katak rai ne'e ninia no iha 2017 mak arguidu halo impedimentu hodi hadau xave sala eskola no hateten "*hahu agora eskola para*" ate agora arguidu seidauk fó xave mak nia hadau no sasin sira uza xave rezerva deit. testamuña deklara durante semana rua sira halao aktividade apredijazem tanba professor/a sira no mós estudante sira tauk no trauma. depois sira informa ba autoridade lokal no parte seguransa hodi normaliza situsau hafoin sira kontinua halao aktividade apredijazem.

Tuir testamuña Estefanus de Lima nu'udar estudante iha momentu ne'eba, iha eskola refere la iha seguransa no iha altura ne'eba profesora Cezaltina de Araújo prepara atu tama hanorin estudante ho nune'e nia entrega xave sala eskola nia hamutuk tolu (3) ba testamuña atu loke odomatan, maibé derepente arguidu mai husi kotuk hodi hadau tiha xave sira ne'e ho maneira obriga no rasta de'it husi nia liman no ameasa dehan "*hahu ba oin eskola para*" hotu arguidu fila ba uma, testamuña deklara katak arguidu hela iha aldeia seluk no nia laos pertense ba aldeia Biseuk, testemuña mós deklara tan katak ho arguidu nia amiasa durante semana rua eskola refere lahalo aktividade apredijazem.

## **Alegasaun Finál**

Prokuradór haktuir katak iha julgamentu arguidu konfesa faktu no reforsa husi testemuña sira, tanba ne'e husu ba tribunál atu kondena arguidu tuir artigu 243 no 253 KP.

Defeza haktuir katak arguidu konfesa faktu, maibé defeza haree katak momentu arguidu ba hadau tiha savi ne'e la ba tan eskola, maibé profesora sira mak uza nia poder hapara tiha eskola durante semana rua, tanba ne'e ba krime obstrusaun autoridade públika husu atu absolve, enkuantu ba krime roubu husu ba tribunál atu deside tuir konfiksaun tribunál nian.

## **Desizaun**

Depoisde avalia faktu sira hotu, tribunál konsidera arguidu provadu komete krime ne'ebé akuza ba arguidu.

Bazeia ba faktu provadu no la provadu sira ne'e tribunál konklui prosesu no kondena arguidu ho pena prizaun tinan tolu suspende ba tinan tolu ba krime roubu, enkuantu ba krime obstrusaun ba autoridade públika tribunál absolve arguidu.

## **9. krime ofensa ba integridade fízika simples ho natureza violénsia doméstika**

Nú. Prosesu : 0016/22.ANANV  
KompozisaunTribunál : Singulár  
Juis : Dr. Naason Mário Armindo Marques Doutel  
Prokuradór : Dr. Nelson J. S. Magno  
Defeza : Dr. Anselmo Pinto  
Desizaun : Pena prizaun fulan 3 suspende ba tinan 1

Iha 20 Feveireiru 2023, Tribunál judisial primeiru Instánsia suai prezide julgamentu leitura sentensa ba krime ofensa ba integridade fízika simple ho natureza violénsia doméstika ne'ebé envolve husi arguidu LL hasoru nia feen AdS, iha Munisípiu Ainaro.

## **Akuzasaun Prokuradór**

Prokuradór akuza katak iha 11 Maiu 2022, iha oras 07:00 dadeer arguidu basa dala tolu iha lezada nia hasan parte karuk no parte loos. Antes ne'e arguidu ho lezada atu lao hamutuk ba sentru saúde atu konsulta, maibé arguidu sei haris lezada uluk ona nune'e halo arguidu komete agreasaun refere hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, (a) 3 (c), 35 (b) no 36 LKVD.

## **Produsaun ba prova sira**

Iha julgamentu arguidu konfesa faktu sira iha akuzasaun no deklara katak arrepende ona nia hahalok no promete sei larepete hahalok hanesan hasoru lezada inklui ema seluk.

Presinde lezada nia deklarasaun, tanba arguidu konfesa faktu hotu iha akuzasaun

## **Alegasaun finál**

Prokuradór haktuir katak mezmu arguidu konfesa ba faktu hotu maibe hare'e ba krime refere nia numeru a'as tebes tan ne'e husu ba tribunál atu aplika pena prizaun no suspende nia ezekusaun.

Entretantu Defeza haktuir katak arguidu konfesa ho integralmete ba faktu hotu no arepende ona nia hahalok tan ne'e husu ba tribunál atu aplika pena ne'ebé adekuadu ba arguidu.

## **Desizaun**

Depoisde avalia faktu sira hotu, tribunál prova katak arguidu basa lezada dala tolu iha hasan parte karuk dala ida iha hasan parte loos. Bazeia ba faktu provadu sira ne'e no tetu mós sirkunstánsia atenuante hanesan arguidu kofesa, arrepende ona nia hahalok, nune'e tribunál konklui prosesu no kondena arguidu ho pena prizaun fulan tolu suspende ba tinan ida.

## **10. Krime ofensa ba integridade fizika simples ho natureza violénsia doméstika**

Nú. prosesu : 0074/22.BBMLV  
Kompozisaun Tribunál : Singulár  
Juis : Dr. Naason Mário Armindo Marques Doutel  
Prokuradór : Dr. Nelson J.S. Magno  
Defeza : Dr. Domingos dos Santos  
Desizaun : Pena prizaun fulan 3 suspende ba tinan 1

Iha 24 Feveiru 2023, Tribunál Judisiál primeira Instánsia Suai prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu MB hasoru nia feen, iha Munisípiu Bobonaro.

## **Akuzasaun prokuradór**

Prokuradór akuza katak iha 12 Jullu 2022, iha oras tuku 14:00 meiodia, lezada husu osan ba arguidu maibé arguidu lakohi fó osan, nune'e lezada revista arguidu nia bolsu, nune'e arguidu tuku kedas dala ida iha lezada nia tilun hun parte karuk, basa dala ida iha hasan parte loos no buti lezada nia kakorok halo lezada moras maka'as iha fatin atinjidu. Kazu ne'e aneksu ho relatóriu ezaminasaun PRADET.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, (a) 3 (c), 35 (b) no 36 LKVD.

## **Produsaun ba prova sira**

Iha julgamentu arguidu hili direitu nonook, entretantu lezada kontinua konfirma faktu sira iha akuzasaun, lezada deklarata katak depoisde akontesimentu liu loron ida di'ak malu kedas arguidu husu deskulpa no di'ak malu fali no depoisde akontesimentu too agora la iha ona problema entre arguidu ho lezada.

## **Alegasaun finál**

Prokuradór haktuir katak mezmu iha julgamentu arguidu hili direitu nonook, maibé parte seluk lezada continua konfirma faktu sira iha akuzasaun, prokuradór fiar katak arguidu komete krime ofensa integridade fizika simples ho forma violénsia doméstika hasoru lezada, nune'e husu ba tribunál kondena arguidu ho pena prizaun fulan tolu suspende ba tinan ida.

Entretantu, defeza haktuir katak perante produsaun prova arguidu hili diretu nonook, maibé lezada continua konfirma faktu iha akuzasaun, parte seluk lezada deklara katak depoisde akontesimentu too agora la iha ona problema entre arguidu ho lezada, nune'e husu ba tribunál medida ba pena ne'ebé mais adekuaudu husu tribunál nia kofiksaun.

### **Desizaun**

Depoisde avalia faktu sira hotu, tribunál prova arguidu tuku dala ida iha lezada nia tilun hun parte loos, basa dala ida iha hasan parte karuk no buti lezada nia kakakrok.

Bazeia ba faktu provadu sira ne'e no tetu mós sirkunstánsia atenuante no agravante ne'ebé haleu krime nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

### **11. Krime ofensa ba integridade fizika simples ho natureza violénsia doméstika**

Nú. prosesu : 0013/22.MFMFI  
Kompozisaun Tribunál : Singulár  
Juis : Dr. Jose Maria de Araujo  
Prokuradór : Dr. Pascasio de Rosa  
Defeza : Dr. Jonas Henrique da Costa  
Desizaun : Pena prizaun fulan 3 suspende ba tinan 1

Iha 27 Feveiru 2023, Tribunál Judisiál Primeira Instánsia Suai prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu FP hasoru nia feen, iha Munisípiu Manufahe.

### **Akuzasaun prokuradór**

Prokuradór akuza katak iha 28 Maiu 2022, iha oras tuku 23:00 kalan, arguidu basa dala ida iha lezada nia hasan parte loos no tuku dala ida iha lezada nia ulun.

Tuir mai iha 29 Maiu 2022, iha oras tuku 5:00 dadeer, arguidu tuku dala ida iha lezada nia ulun, tuku dala ida iha lezada nia liman fuan, tebe lezada nia kelen no sama dala ida iha lezada nia ain parte karuk. Motivú husi aktu ne'e arguidu ulun moras, estomuk hakas no bee doko hakas.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, (a) 3 (c), 35 (b) no 36 LKVD.

### **Produsaun ba prova sira**

Iha julgamentu arguidu konfesa faktu hotu iha akuzasaun no deklara katak baku feen

ne'e la di'ak, arrepende ona nia hahalok no promete iha futuru sei larepete ninia hahalok ne'e hasoru lezada, arguidu deklara tan katak depoisde akontesimentu too agora la baku lezada too ohin liron.

Alende ne'e lezada kontinua konfirma faktu sira iha akuzasaun no reforsa katak depoisde akontesimentu too arguidu labaku ona lezada.

### **Alegasaun finál**

Prokuradór, haktuir katak arguidu arguidu komete krime hasoru lezada nu'udar nia feen, arguidu mós hatene katak baku feen ne'e ladi'ak maibé nia baku nia feen. Tanba ne'e husu ba tribunál atu kondena arguidu ho pena ne'ebé adekuadu.

Entretantu, defeza haktuir katak arguidu konfesa, arrepende ona nia hahalok no promete katak sei labaku nia feen, nune'e husu ba tribunál atu kondena arguidu bazeia ba konfiksaun tribunál nian.

### **Desizaun**

Depoisde avalia faktu sira hotu, tribunál prova katak arguidu komete krime ofensa ba integridade física simples ho natureza violénsia doméstika ne'ebé arguidu konfesa no konfirma husi lezada. Bazeia ba faktu provadu sira ne'e no tetu mós sirkunstánsia atenuante sira hotu, nune'e tribunál konklui prosesu no kondena arguidu ho pena prizaun fulan tolu suspende ba tinan ida.

### **12. Krime pekulatu**

Nú. prosesu	: 0045/16.PGGCC
Kompozisaun Tribunál	: Koletivu
Juis	: Dr. Naason Mário Armindo Marques Doutel, Dr. Jose Maria Araujo no Dra. Patricia de Fatima Xavier
Prokuradór	: Dr. Pascacio de Rosa Alves
Defeza	: Dr. Tomazia Unbelina Magno (Advogadu)
Desizaun	: Pena prizaun tinan 3 suspende tinan 4

Iha 27 Fevereiru 2023, Tribunál Judisiál primeira Instánsia Suai prezide julgamentu leitura akordaun liuhusi telekonferensia ba krime pekulatu ne'ebé envolve arguidu Jacinto Fransisco Xavier ne'ebé kondisaun moras hasoru Estado RDTL, iha Munisípiu Covalima.

### **Akuzasaun prokuradór**

Prokuradór akuza katak arguidu hahú nia serbisu nu'udar funsionariu nivel 4 iha Ministériu Agrikultura no peska komesa husi 2007 too 2013, no kolokadu iha Munisípiu Covalima.

Iha tinan 2014 too 2015, arguidu hetan nomeasaun nu'udar responsavel lojistika iha ministeriu agrikultor no koloka ba iha munisípiu Covalima, arguidu hanesan funsionariu publiku nivel 4, kada fulan arguidu hetan salariu US\$221.00, salariu ida ne'e arguidu simu komesa husi tinan 2007 too 2015, hafoin iha tinan 2015, arguidu nia salariu aumenta ba US\$ 230.00 aumenta ida ne'e tanba arguidu nia eskalaun aumeta.

Bainhira arguidu sei hanesan funsionariu bain bain komesa husi 2007 too 2009 arguidu nia salariu selu direita husi Yosep Suri Nuac, nu'udar tezoreiru Finansa Munisipiu Covalima. Haktuir prosedimentu ne'ebé fó sai husi Payroll Nasional, pagamentu salariu iha BNU salariu tama direita ba arguidu nia konta bankaria 643255610001 ho naran Jacinto.

Iha tinan 2011 ho inisiativa rasik, arguidu muda fali nia salariu husi BNU ba fali BNCTL ho numeru konta 104001748 ho naran Jacinto Fransisco Xavier. Arguidu muda nia konta bakaria husi BNU ba fali BNCTL la liu husi prosedimentu adminstrasaun nian, arguidu ba direita iha BNU hodi husu halo tranferensia nia salariu ba fali BNCTL sein justifikasaun ruma.

Bainhira arguidu mudansa ba nia salariu husi BNUba BNCTL, sein kuinesimentu husi diresaun rekursu umanu ministeriu agrikultura no peskas munisipiu covalima nian. Tanba la iha kuinesimentu, diresaun rekursu humanu ministeriu agrikultor no peka munisipiu covalima nian mos haruka kart aba payroll nasional hodi halo mudansa ba salariu arguidu nian husi BNU ba fali BNCTL. Nune'e akontese katak arguidu simu salariu dupla iha fulan hanesan ho naran Jacinto Frasisco Xavier tama iha BNCTL no BNU ho valor kada banku US\$ 221.00 total fulan ida arguidu simu US\$442.00

Bazeia ba sistema tezoreiru nasional nian, arguidu nia numeru PMIS mak 260738, numeru payroll 23529 no salariu mensal tama iha banku BNCTL, sikhifika salariu mensal ho kuantia UD\$ 221.00 ne'ebé tama iha banku BNU ho naran arguidu Jacinto Tab ne'e la loos no arguidu la iha direitu ba osan ida ne'e.

Arguidu simu salariu dupla ne'e hamutuk fulan lima nolu resin haat inklui salariu decimo terseiru dala haat, komesa husi fulan marsu 2011 too fulan maiu 2015 no ne'ebé mak tuir lolos arguidu nia direitu hamutuk US\$ 11,934.00 ( $221.00 \times 54 = 11,934$ ). Husi osan US\$ 11,934.00 ne'e arguidu gasta ona US\$ 8,799.00 no restu ne'ebé mak sei iha hela arguidu nia konta BNU ne'e US\$ 3,135, Payroll blokeia tiha tanba deteta ona iha pagamentu salariu dupla ba arguidu.

Konsekuensia dereta no nesesariu husi arguidu nia hahalok estadu Timor-Leste hetan prejuuju ho montante US\$8,799.00.

Prokuradór akuza arguidu kontra artigu 295 KP nu 3 kona-ba krime pekulatu ho moldura penál tinan 4 too tinan 12 ka tinan 2 too tinan 5.

### **Produsaun ba prova sira**

Iha prosesu julgamentu, arguidu konfesa faktu hotu iha akuzasaun no deklarata katak hahalok ne'e ladi'ak, promete futuru sei larepete ninia hahalok, arguidu deklarata katak osan sira ne'e devolve hotu fali ona ba ministeriu agrikultor nia konta bankaria.

Testemuña Yosep Suri Nuac, nia deklarasaun deklarata katak hahu nia servisu hanesan tejoreiru iha ministeriu finasa koloka ba iha munisipiu Covalima, testemuñ foti lista manual pagamentu ne'e husi tejoreiru nasional no hafoin pagamentu ba funsionariu hotu-hotu,

testemuña hatuir katak kona-ba arguidu nia konta bankaria rua ne'e testemuña la iha kuinesimentu, hafoin detekta husi minsteriu agrikultor mak blokeia tiha nia konta bankaria,

Testemuña haktuir katak bainhira funsionariu ida atu muda nia konta banakaria tenke informa ba parte rekursu humanu no hetan aprovasaun hafoin muda nia konta bankaria.

### **Alegasaun finál**

Prokuradór haktuir katak, arguidu provadu komete krime pekulatu ne'ebé arguidu konfesa faktu hotu, mesmu arguidu devolve fali hotu ona osan sira ne'ebé tama iha arguidu nia konta bankaria, prokuradór haree katak arguidu nia aktu ne'e labele tolere, ho nune'e husu ba tribunál atu kondena arguidu ho pena prizaun.

Entrtantu defeza haktuir katak, iha julgamentu arguidu konfesa faktu hotu iha akuzasaun no prejuiju ne'ebé estadu hetan, arguidu devolve fali hotu ona, tanba ne'e husu ba tribunál atu kondena arguidu ho pena suspensaun.

### **Desizaun**

Depoisde avalia faktu sira hotu, tribunál prova arguidu nia aktu ne'e priense elementu krime pekulatu ne'ebé arguidu rasik konfesa total faktu sira iha akuzasaun. Bazeia ba faktu provadu sira no tetu mós sirkunstánsia atenuante sira hanesan arguidu koestra ordinariu katak antes ba julgamentu arguidu devolve fali ona osan estadu nian ne'ebé arguidu gasta no arguidu mós konfesa faktu hotu, arrepende ona nia hahalok, nune'e tribunál konklui prosesu no kondena arguidu ho pena prizaun tinan 3 suspende ba tinan 4.

### **13. krime ofensa ba integridade fízika simples ho natureza violénsia domestika**

Nú. Prosesu : 0008/22.MFTRS  
KompozisaunTribunál : Singulár  
Juis : Dr. Naason Mário Armindo Marques Doutel  
Prokuradór : Dr. Nelson J. S. Magno  
Defeza : Dr. Jonas Henrique  
Desizaun : Pena prizaun fulan 3 suspende ba tinan 1

Iha 27 Fevereiru 2023, Tribunál Judisiál Primeira Instánsia Suai prezide julgamentu leitura sentensa ba krime ofensa ba integridade fízika simple ho natureza violénsia doméstika ne'ebé envolve arguidu JT hasoru nia feen, iha Munisípiu Manufahi.

### **Akuzasaun prokuradór**

Prokuradór akuza katak iha 11 Setembru 2022, iha oras 06:00 dade, arguidu tuku dala rua lezada nia rentos no tuku dala ida iha matan fukun parte loos, antes ne'e lezada halo rahun tiha arguidu nia telemovel nune'e arguidu nerboju halo agreasaun refere hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, (a) 3 (c), 35 (b) no 36 LKVD.

### **Produsaun ba Prova sira**

Iha julgamentu arguidu konfesa totalmente ba faktu sira iha akuzasaun no deklara katak arrepende nia hahalok, foin mak mai hatan iha tribunál no depoisde akontese lakomete ona krime.

Alende ne'e, lezada kontinua konfirma faktu iha akuzasaun no deklara katak depoisde akontese too agora arguidu labaku ona lezada too ohin loron.

### **Alegasaun finál**

Prokuradór haktuir katak maske arguidu konfesa ba faktus hotu maibé hare'e ba krime ofensa integridade fízika simples ho natureza violénsia doméstika nia numeru a'as tebes, nune'e husu ba tribunál atu aplika pena prizaun no suspende nia ezekusaun.

Entretantu defeza haktuir katak arguidu konfesa ho integralmete ba faktu hotu iha akuzasaun no arrepende ona nia hahalok no depoisde akontese arguidu la repete ona nia aktu ne'e, nune'e husu ba tribunál atu aplika pena ne'ebé justu ba arguidu.

### **Desizaun**

Depoisde avalia faktu sira hotu, tribunál prova katak arguidu komete krime hasoru lezada. Bazeia ba faktu provadu sira ne'e no tetu mós sirkunstánsia atenuante hanesan arguidu foin mak mai hatan iha tribunál, arrepende ona nia hahalok, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

### **Atu hetan informasaun liutan favór kontaktu:**

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: [ana@jsmp.tl](mailto:ana@jsmp.tl)

[info@jsmp.tl](mailto:info@jsmp.tl)

Website: <http://jsmp.tl>